



Hasanović: Još ga obrađuju

Istraga o napadu na Policijsku stanicu u Zvorniku TRAŽE SE SAUČESNICI

Predmet istrage u narednom periodu biće utvrđivanje motiva napada, kao i pronalazak eventualnih saučesnika

Pripadnici zajedničkog istražnog tima, u nastavku aktivnosti povodom terorističkog napada na Policijsku stanicu u Zvorniku, koji se dogodio početkom sedmice, u srijedu su pretresali objekte na dvije lokacije na području Kalesije i Zvornika, koje koristi osoba čiji su inicijali M.D. Pretresi su vršeni po naredbama Tužilaštva i Suda BiH.

Kako je saopšteno iz SIPA, višeni su pretresi stambenih objekata i drugih prostorija s ciljem pronalaženja i privremenog oduzimanja predmeta koji se mogu dovesti u vezu sa krivičnim djelom terorizam i poslužiti kao dokaz u daljem postupku.

Kriminalistička obrada

Kasim Mehidić i Avduh Hasanović, koji su uhapšeni u utorak, dan nakon terorističkog napada na Policijsku stanicu u Zvorniku, kada je ubijen policajac Dragan Đurić, a dvojica njegovih kolega Željko Gajić i Stevo Milovanović ranjeni, u srijedu su bili na kriminalističkoj obradi u prostorijama Regionalnog ureda Državne agencije za istragu i zaštitu (SIPA) u Tuzli, potvrđeno nam je u ovoj agenciji.

- Aktivnosti se nastavljaju u pravcu rasvjetljavanja i dokumentiranja krivičnog djela. Nad osobama K. M. i A. H, koje su lišene slobode, i dalje traje kriminalistička obrada, kazala je u srijedu popodne Kristina Jozić, glasnogovornica SIPA.

Podsjećanja radi, pripadnici zajedničkog tima nekoliko sati nakon samog događaja uhapsili su Hasanovića iz Šetića kod Zvornika i Mehidića kod Kalesije. Hasanović je organima gonjenja poznat od ranije, kada je hapšen zbog ratovanja u Siriji. On je uhapšen u septembru 2014. sa Huseinom Bilalom Bosnićem u akciji Da-

mask, a nakon dva mjeseca provedena u pritvoru, pušten je uz mjere zabrane.

Boris Grubešić, portparol Tužilaštva BiH, kazao nam je kako očekuju da će osumnjičeni Tužilaštvu biti predati u četvrtak te dodao da će predmet istrage u narednom periodu biti utvrđivanje motiva napada, kao i pronalazak eventualnih saučesnika.

Predsjednik Saveza opština i gradova RS-a Mićo Mičić upozorio je u srijedu da, nakon terorističkog napada u Zvorniku, politička situacija u BiH značajno utiče na strana ulaganja i da je važno zajednički osuditi terorizam i zajednički raditi na očuvanju stabilnosti.

- Osnovni uslov za dolazak stranih investicija i ulagača u bilo koju jedinicu lokalne uprave je politička stabilnost BiH i RS-a i dobro je što smo svim snagama i svi zajedno osudili problem, rekao je Mičić, prenijela je Srna.

Nema političkih poena

On je ocijenio da nesreću ljudi ne treba koristiti u političke svrhe ni za sticanje političkih, ličnih ili partijskih poena.

- Mislim da je dovoljno rečeno, oglasio se velik broj institucija i ljudi lično, da se terorizam mora spriječiti, rekao je Mičić. **E. B.**